

四庫全書

集部

欽定四庫全書

集部  
午亭文編卷六  
七

詳校官庶吉士臣汪彥博

助教臣常循覆勘

總校官庶吉士臣倉聖脉

校對官中書臣牛稔文

謄錄監生臣許紹錦

謄錄監生臣齊兆求

欽定四庫全書

午亭文編卷六

大學士陳廷敬撰

古體詩

七夕以柳惲流景對秋夕為韻作者錢亮工蔣京  
少吳震一方臯宗宋推恭于蓮士兒子豫朋五  
首

霜娥垂半鬢清暉寒欲流復此照銀浦影落榆花秋天

人苟無情靈匹何相求況我二三子能不結綢繆

清響迴新飈絕冥倒浮景流盼年光斜數子入眼冷擊  
筑今遊燕變徵或歌郢鉞樓人應眠文字坐馳騁

青鵲西飛來承華閱靈對此時東方生矯矯蒙英睞我  
本曬書人兼有標禪態心慕王子喬吹笙騎鶴背

玉露未搖落志士懷凜秋清淺河漢水盈盈萬古愁星  
明佇含睇美人凝目留思君薦瑤席託興於牽牛

鳳駕歲不虛龍梭月再擲平時掃門人已斷轍蹄迹縱

酒酌清流濯纓謝華劇將子復能來餘歡繼閨夕

贈于蓮士

逢君薊門樓對月滄海頭濯髮青漢邊下視渺九州我  
生走燕營意亦陵高秋南行不百里江湖思遠遊蘭橈  
帶桂檠萬里橫中流巨靈撐兩足金焦雙拍浮物產必  
英異所見何殊尤豈知離鷗輩不與飛鵬儔美才具舟  
楫明義敦山邱勗哉賢知士攬古光前修

天禧宮古松歌次敦復韻

張公走馬旋風松如騎鶴背陵仙宮青山崩迫白日冷  
天驚破碧騰遊龍抓挐霜霧勢律吼劈裂雷雨聲籠銅  
太華並根盤后土扶桑接葉橫高穹相傳已自昧年歲  
殷柏周栗將無同孤高節目復磊砢落落寧許秦人封  
計株四十又加四大荒野陰連鬱蔥樛枝交加影疊見  
晴雲曉月還玲瓏苔色常濃殆自古濤響不息非關風  
千年茯苓此易得便欲劖之誰吾從神訶鬼守語匪幻  
心旌搖搖曾杵春再拜肅謝愧自責干霄豈辱塵埃中

不見慈恩雙老樹馬嘶羊觸紛西東棲棲盤踞不得地  
只今枯幹無留蹤松乎託身有如此能令萬古凡松空  
日斜杖策陪公去烟村已遠聞微鐘

露涓閣望西山懷退谷舊遊二首

秋山日轉佳天清遠峰集蒼然氣高浮薄雲飛不入風  
吹縹緲樓對此每獨立徑微忖昔遊松落思俯拾何時  
曳芒屨未憂露草溼寂寥退翁亭遺蹟渺難及

退翁耕近郊九經騁劇談尺五韋杜曲氣與霜空函及

其棲北山捷徑非終南遊子領微尚幽僻性所耽旅食

走京輦冷眼衝雲嵐青箱王公堂酌我春酒甘

王文貞公二

老道淪喪後生失毛冊短歌繼八哀冥漠天如藍

退谷孫公

北海所居

### 廖生行

廖生文采殊絕倫萬卷讀破筆有神試之有司輒不利  
生顏閔默亦不嗔為生短歌添酒巡棄置世事談蒼旻  
天公居高蓋覆廣豈盡照燭窮幽垠役使衆靈雜鬼物



擎執造化搏鴻鈞轟雷掣電走風雨鞭驅日月排星辰  
妖祥彗蝕猶尚爾况分曹府滋紛紛陸飛水潛山土藏  
各有主者如官臣量才大細百失一構櫨采楠寧皆真  
生乎與汝在世上直須勤買拋青春我歌君飲休辭頻  
萬事颺忽風中輪驥子十齡吾所珍頭白笑我徒苦辛  
淵明賢愚挂懷抱不見韓昶謫根銀煩生教兒粗識字  
姓名足記堪漁薪何必嗚咿學老子鼓刀販繒亦致身

西山道中作二首

我築晚晴臺以瞰西山故明滅嶺上霞依微巖際樹未  
解塵鞅緣遙寄邱中趣埤塘仰樵蹤簾閣俛鳥路遊思  
娛清暉清暉時一遇川長限無梁彩雲不可度振衣寒  
松嶺稅駕流泉處良遊勿蹉跎歲月易遲暮旅行循烟  
村幽探散沙鷺臺高輟迴眺山近展徐步二客儼能從  
英流况厨顧既同西園遊時吟晚晴句石欄點筆人空

翠沒巾屨

同遊廖芸  
夫子蓮士

昔與王侍郎

阮亭受

詔並為詩兼徵風所製君進西山辭茲訪山中勝因以  
此卷隨涼風開篋笥山鬼來潛闕四顧舊所歷蒼茫多  
路歧侍郎既特達拙疾予棲遲山水自陶寫猿鶴相攀  
追離鴻過我前鳴聲何苦悲往時山遊人北宋與南施  
荔裳文采今已矣大雅將在誰荒途披蔓草空谷羅華  
愚山滋行行騁遠步言近茲山陲

自聖感寺至寶珠洞西山最高處

迴磴陵虛空秋雲

御道長六龍所經處萬壑流神光半嶺礙河漢列宿方  
低昂猶未窮絕頂已足擘大荒平坡名豈稱新額題鸞

凰

故平坡寺  
賜額聖感

窈窕陟危徑兩腋靈風翔洞中雖幽仄其

外何堂堂雙闕那可辨一氣連混茫碣石在眼底滄海  
濱城隍我聞道家說三十六玉皇上有無極天此山或  
相當帝都跨嶽鎮頂背孰敢望俛視宇內山蠟屐可卷  
藏惜哉近市朝終焉難徜徉樊山一卷石臨老神黯傷

龍泉寺下院

日隱原上村秋陰起桑柘杳杳隨烟鐘悠悠遠峰下境  
空放梵長天迴飛雲瀉松門晚色靜碧草淨可藉風吹  
籬邊花寒香正盈把薄遊步清曠所歷向瀟灑樂幽抵  
嗜芰味道如啖蔗至人患有身矧復簪纓假息心同冥  
寥聊此繫吾馬

玉佳菴

商飈振幽厓杖策跨蹊谷翻帳去徑宵何以極吾目稍  
上天影開餘翠澹林木高臺秀遠峰日入淨如沐微興

方陶然滅迹向茅屋仰躋清泉流冷冷灑飛瀑攀危不  
辭疲留念遲往復

龍泉寺

金銀二泉流乃在星漢間冷風不可御遠望空雲烟忽  
見秋山池映此碧玉環神魚長鬚鬣色異凡鮪鱸日影  
布石上魚躍不在淵食葉如樹遊吹氣成花園洑流繞  
砌來吾欲尋其端稍憐松殿側泉眼明微瀾西軒俛木  
杪巖徑聞哀湍此泉自遙昔斯人如逝川誰能向杳靄

終掩青蘿關

徑祕魔嵯登盧師山作

谿迴秋風溫徑仄殘陽閃坡陀下高風草木相掩苒填  
咽谷葉丹山翠疊磨颭流澗波叢林清暉濃於染輟策  
稍忘疲駢席不覺險昔人晏坐處苔石無嵯广狎玩大  
小青理至物自感視龍猶蜺蜉亦拘檢而我遊人  
間所遇足嗤點悵然盧師山觀身老冉冉

碧雲寺二首

寺門臨高橋澗松交其端徑幽室何許欲憩行便姍瑣  
細花蒙密駁華苔黃緣長欄樓間雲曲榭縈孤烟稍深  
境轉佳靈風來清絛流泉隔篁竹日斜聲濺濺琤琮寫  
哀玉迸落如佩環山水解娛人何事歸塵寰

溼雲被層阿餘霞帶前軒夕泉流愈駛林際驚湍奔尋  
山欣野宿汲水遲夜餐迢迢漏鼓斷漠漠烟磬昏煩囂  
於此息清迴悽之魂風定寒蛸響月黑歸鳥翻匡牀靜

無寐松牕明曉暾

是日宿  
寺中



來青軒觀紅葉歌

來青之軒颯高爽我來直欲攀蒼穹便因長空溯海月  
側身萬里三山東深山晦魄心轉悸假道北寺烟溟濛  
晨光小雨暗青笠白雲如絮連遙峰緣溪林木亦瑣細  
寒香幽草方蔥蘢豁然此軒倪下界千樹萬樹新霜紅  
是時西顥實司令赤帝行氣何冲融跨坑駕谷太陵競  
金烏避路爭瞳矐視之睨眴久不定羈魂閃爍眼力窮  
我本看山悵無月豈知奇詭驚愚蒙黃鶴仙人日來往

霓旌火傘紛相從  
白榆但見露葉墜  
碧桃不覺春花濃  
丹砂布地靈境閤  
朱顏一笑迴天風

西山歸憩西樵門外雜記遊事

山行意軒然不復肯慵惰  
同來盡所親幽探亦屢作  
友生各有適語默相答和  
大兒學阿爺吟詩勤自課  
小兒十齡許能騎駿馬  
大迴策已如縈歷塊欲揚  
堞未忍斥輕肥一哂衰  
顏破草菴具野餐歸路發  
清餓乍辭山泉甘頗怯塵  
羹浣怖鵠晨不鳴蒼蠅晚  
相過攘攘浮埃間

掩耳但困卧

昭王臺

春風吹綠草歷亂昭王臺空憐天下士祇為黃金來燕  
山落日出滄海古人白骨今安在海水東流西日斜但  
沽美酒燕姬家莫問當年陵谷事薊樓明月土城花

輓鄭大夫

振華

建安秀江嶺萬古一考亭天遊羣鸞翔三十六峯青一  
峰上巉絕屹若劃巨靈紫陽光日月我公聲雷霆小學

字忠孝大篇文六經舍生取仁義宜祀於孔庭女史並  
記載烈烈同芳聲郎君辱齊年遐躅思儀型回首題名  
處春風語塔鈴年年蒲柳綠人散稀晨星曹官偶接膝  
遺直明邦刑衙餐訊往跡輟箸涕泗零以余謬好古命  
我為公銘銘當三熏沐短歌侑神聽

贈衍聖公翊宸

見公問廟檜溯往徵其形世六十有七二千三百齡元  
氣祕柯葉修幹苞蒼青我聖宰萬彙豈獨一物靈不賢

識其小有問辱公聆答言林多花被徑如繁星記一不  
辨九無名但芳馨皆門人土宜手自來封扃惟少杏與  
桃此理尤晶瑩林端所生著莫敢擷寸莛旁下略采掇  
候過秋上丁積之凡二歲數適大衍零許以當持贈奚  
慕堯時莫斯文慨遐邇俄頃瞻儀型公親聖人裔淵角  
蕪山庭絕學可繼聖為公几杖銘

前山望王屋山懷蔡松年

青山深淺中丘壑不一致清晨登前山高秋散幽意千

里如玦環黛色遙相次杳杳數峰間閒雲忽飄墜我遊  
王屋山靈境仙所閔君昔從我遊棲隱偕宿志故人今  
在否臨風發遠喟

池上晚秋

山池如迴溪緣流時獨往潺潺出石間幾曲聲逾響殘  
荷雖已零秋水日夜長澗邊木芙蓉亭亭接幽賞波淨  
理輕舟聊作江湖想

木芙蓉

灼灼拒霜花顏色衆所殊豈不惜芳時乃與晚歲俱天  
桃太冶豔野菊何蕭疎感此凌寒姿獨立將焉如

秋曉由樊溪至山園

徑迴水鳥喧寒流隱疎樹風竹覆野橋離披豁幽步巖  
柯交日影籬花明曉露池館寂無人雙溪杳自注

雨後至南園

初霽涉南園曉池風寂歷前村雲未歸高樹雨猶滴塵  
外體自舒林中欣有適遊目極遠山秋烟淨如滌

遣興四首

牽牛蹊人田田主取其牛蹊則良不直取牛致足羞螳  
娘與異鵲忘身將誰尤微哉乘除理芒芴不可求

重耳重五賢卓犖霸圖起胥臣賞先茅所貴在得士流  
風傳自今齷齪安足擬初奚請老歸舉讐且舉子

前驅射叔武弦高犒秦師見義為則勇功過焉用知嗟  
此志士節遭彼愚者嗤別嫌古所戒來日猶可追

嗣宗澹蕩人寄懷特高妙臧否不挂口林壑展清眺蕭



然蘇門生對之發長歎寥寥鸞鳳音千載孰同調

待友

微曛度斜澗暝色赴前嶺石泉激清響風篁澹疎影烟  
鐘殷林深山禽宿夜永思君拂鳴琴巖壑渺愈靜

秋懷

寒色起亭臯高樓遠峰集山斂夕曛低牕疎野烟溼畫  
欄見木末一葉新可拾景逸情未懶心賞歡何極

自南村徑石院抵九仙臺

紅葉深紅與淺紅  
濕雲細雨如春濃  
桑柘半凋柳黃落  
三里五里村村同  
徑轉溪開歎奇絕  
千山萬山皆玲瓏  
誰令巖壑擅異色  
純以金碧施神工  
寒烟消歇亦變態  
怪石磊砢環孤峰  
宇內名山亦無數  
此山如畫展毫素  
我聞廬山最佳麗  
丹崖紺壁儼畫具  
一峰道人飛仙人  
揮染平生釣遊處  
浮嵐暖翠曉千重  
玉洞桃花春萬樹  
仙人既去亦復還  
白雲黃鶴遊人間  
清都渺渺在何許  
玉階朝罷棲名山  
只今畫者誰其匹  
天高氣清風寥慄

欲攬太空為粉圖消得仙人兩三筆

時攜得大  
擬畫卷

### 南村

烟中見南村窈眇徑迷舊陟危驚景佳問俗訝名陋

村陋

其名丹砂一林染鳴玉衆泉漱傍巖開荆扉雞犬喧清晝

幽興未云足古道迎隻堠

### 宿石淙院

山房行欲近半空人不知微逕礙古木青靄來差池鳴  
脚寒已亂鳥翼昏相追林開孤烟出飛崖落屢屨巨靈

擘左股元氣猶淋漓森嚴驚鬼物幽險疑蛟螭石坎象  
鐵盆千古垂流淅淙淙一線長晴雨無盈虧逝者有如  
此吾生幾何時

潞州留別送者

相送潞州道別袖屢已揮親賓自此盡徒侶相對稀薄  
暮涉漳河波浪沾人衣悲風起中流木葉交加飛四顧  
別時跡行塵連夕暉遊子感居人况乃骨肉違我無經  
世術空自勞驂駝所願官吏賢敢嗟生事微耕稼供井

稅道遙侍親闈誰甘遠離別遠離還思歸

湊酒歌因玉田孟君寄曹冠五使君

易酒甜多雪酒惡見花對月空蕭索前年滄酒貫滄州  
長瓶開瀉碧玉流年年泛溢東風蚤臘味輕香不全好  
依舊花前又寂寥那能月下常傾倒卻憶遼西塞上行  
酣歌劍舞出關城離筵嘗徧京東酒湊酒淋漓最有情  
東流湊水行相餞近海清波淨於練誰將湊水變春醅  
曹家兄弟成歡宴兄為二千石小弟尚書郎錦衣休澣

敬愛客醉卧玉缸新酒傍朔雲去雁分飛後回首邊沙  
盈別袖鵲原宿草幾番青使君朱顏宛如舊玉田孟君  
飲者豪絲繩絡送瓷罌高東過湓水谿邊路因風為寄  
相思句湓酒歌歌正愁我今潦倒行歸休千巖萬壑太  
行險焉能致此燕山頭

對酒

秋山銜落日對酒黃金臺坐失萬古愁朱顏一為開孤  
斟快心賞海月天邊來連霞隱高雁吟風空復哀霜邊

野菊色盈盈照尊罍含情忽不飲白鬢紛相催忘形在  
濁醪浮名焉用哉

東坡和淵明讀山海經十三首謂其七首皆仙語  
讀抱朴子有感和之余嘗欲作遊仙詩因次其  
韻

人生醉與夢去天猶未疎以茲二者故終日息吾廬興  
至一把杯倦時或枕書故人多輕肥不必迴其車閉戶  
長幽草近市便美蔬形影互相答神明聊與居暫為生

時計亦豫世外圖列仙不可幾吾衰將焉如

至人黃石公青瞳方朱顏來往穀城道隱見千萬年上  
天下瀛海遊戲碣石山遺我丹臺書肯與世人言

子房師黃石太華凌垤邱辟穀西入關英風渺難儔降  
心圯上老俯視園綺流聖道久不作且復為仙游

維南有王屋維北乃洞陽靈仙所窟宅杳杳烟雲長朝  
罷金銀闕鶴駕來輝光授我丹竈訣坐待爐芽黃

散遣雙玉童孤鶴生愛憐晨騎朝碧落暮跨歸神山道



逢青鳥使相贈以好言服食飲美酒與子保遐年

伊余恨物感神喪如槁木泠然御長霄墮此深崖谷  
仙人憐垢氛為我勤湔浴時乎迫崦嵫悲歌至秉燭

矯矯瓊樹枝羅生玉堂陰丹鳳一來儀和鳴成高林  
半空天樂流誰能寫其音翹首虞山下肅然清我心

登真御寥廓頗怪日月長當其寂寞時洞天為故常  
織女縫裳衣帝厨具饌糧豈特善口體萬年樂未央

生不能追飛復不能投走季布諾千金在世誠無負磬

磴執鄙吝於我意何有仙人勸酒杯且飲乾勿後

東遊登高邱渺然望雲海金堂玉室間仙真一一在青  
天絕紅埃一去應不悔丹砂定可成白髮幸相待

淵明真仙人明明凜帝旨太傅才英奇至今皆不死偉  
哉東坡公忠亮可蹈履三賢友黃石萬劫足相恃

翩翩雲中鶴下覩漫浪士仙人騎之來物外爰集止百  
年雖旦暮小住聊復耳願為仙人鶴鳴和及其子

吾本幽愛人自無磊落才世故豈我願紛然胡為來六

鑿滋堊礙諸天多嫌猜海山非歸處兜率或庶哉

出郭

出郭沙水清野林日杲杲柳眠風弄姿花落枝亦好遠  
山森入畫亂紅堆可掃昨日鏡中人朱顏今日老花稀  
柳復濃玉壺自傾倒及茲華髮時且勿驚衰早

循西山下夜行達曉

落月欲落山之西綠烟未滅金盆低插天青嶂橫丹梯  
林壑窈冥微徑迷臨風悵望心魂悽道轉高橋溪碧沙

堤平柳眠雀啄花杏飄殘雪桃蒸霞我行已到山之涯  
東方海雲騰日車

書沈石田山木畫次其自題韻

我拙不解畫亦自喜竒逸朱粉姑置之蕭森此木石放  
意寫荒寒棲神遊遠碧染雲山半青落墨葉盡赤提挈  
羈旅頻卷舒日月疾署字是何年誰為弔古客

見月

夏雲如水交橫過上有明月新嵯峨我欲弄月乘輕波

青天無梁風浪多陵風一舉君謂何

久雨

久雨殊未佳幽懷况鮮樂愁此偈仄居凜凜陷於淖高  
旻停日車積陰連雲駁流霧捲地飛驚泡濺堦闌平土  
水數尺窪處在泥窖暫歇還更然檐禽語稍稍稚子總  
無憂不能復騰趨排牆慮見及所傷豈皴皸天神自明  
聰非龍失告教吾欲扣上穹微悃諒弗効中夜坐咿嚶  
困眠曉不覺

五月十二日重遊崇效寺尋雪公看花之約後二  
日阮亭侍郎亦往遊焉以五月江深草閣寒為  
韻賦詩予亦作七首

野行不覺遲人影改亭午言尋惠休居豈獨招提古門  
前閒草花戲蝶自迎舞脩槐可中庭綠陰欲拾取飄然  
紅樓客笑齒粲可數問法離文字吟哦劇何苦斜風見  
動旛落日隱懸鼓我亦困詩妄新集編夏五

昨遊尋東風徑草細綠髮微憐屐齒香散步意超忽青

春歸茫茫幽芳亦未歇曲廊通野園曠若人寰闕古邱  
今猶存崩剝瘦見骨有似鱗爪枯中心自突兀四邊千  
樹棗嫩蕊嬌不發報花如報竹素書來一月

書中何所云上云花在椿會當莒蒲節可供纓絡幢下  
云梔子林清芬散北牕長謡寄遐想覲止心則降開函  
愁細字數數挑銀缸我詩如號鄒子男亦陋邦大師鄙  
豈可居士慕老龐潘鬢已久白安用文如江

文章小技耳吾欲觀其深以茲破萬卷寓我不住心湛

然遺句字忽流天樂音譬之雲在天變化無古今形影  
豈一同蹤跡難重尋所以自開闢天雲長浮沈我心正  
如此萬劫勞相侵雖被世俗嗤或為知者欽

折簡謝見招單車徑相造古殿橫翠微初地長瑤草天  
矯槐龍蟠嚶叨竹鳥好顧渚淪泉芳來禽展匣寶因從  
學佛閒便欲為農老留客看治瓜餉鄰擬剥棗還坐讀  
我書西軒日杲杲何當卜夜闌軟語傾懷抱

寄詩詩如何問花花恐落漠漠塵沙中鬢絲想禪樂別



後秉畫燭橫陳蠟如嚼誰能從老僧破衲鐺折脚永絕  
羅綺緣亦無妻子縛又聞王侍郎欸門攜酒杓諸子並  
豪英紅顏矜綽約而我方寂然清風開卧閣

憶昨俯寺閣縹緲高雲端青天琉璃道日暮凝薄寒驚  
電徹眾愚宛虹垂闌干山門揖塵土歸徑跡已殘黃縑  
映繡轂憂患如翻瀾幸枉霞上作猶論巖中懽浮艷不  
挂眼新詩獨永歎子美師梁可良遊思渺漫

北峰

西山轉北峰城中見尋尺始晴出半岑橫雲帶斷碧劃  
如人靜好媼娥露修額紫臺連連沙紅顏慨遙昔年年  
黑山春雪花青塚積羈士心多悲對此成目逆

久雨喜晴懷王顥菴侍郎兼簡阮亭

曉雨送廉纖晚雨迎絡繹歸來困欲卧屋漏牀牀窄稍  
聞流泉響樵語間嘒嘒夢裏青山長行盡溼無迹忽覺  
失烟霞孤枕斜光射晴鳥引圓吭風櫺轉清唌陰雲雖  
解駁書琴久狼籍低徊把君詩吟誦手忍釋不獨銷愁

憂兼亦快風昔公朝時聯鑣官曹日接席玉山映顏顏  
瑤草起沉癖但無樽酒歡流連展遙夕况逢濟南生腹  
笥藏簡冊說書口瀾翻論古人辟易一臺二妙俱我老  
壯神魄風流襍案牘相對未蕭索往來同癖署何俟越  
阡陌已辦青銅錢共醉慰衰白

六月二十五日

召至南書房

賜

御書手卷挂幅扇恭紀

金猊踞地龍蟠棟赤霄雲卷晴暉重玉階行上近椒風  
小殿開簾塞額鳳青疏斜明飛紫烟封題宛轉光射天  
下臣姓名起微陋磨丹

親署迹未乾一函三錫煩屢識光華炯炯浮長箋

臣名

上所署驪珠迸出蛟螭纏颺若雷電隨毫巔皎若日星麗

璣璇霖雨初霽萬象妍錦機匹練天孫製淋漓

御墨香螺漬書罷留題與後人剪刀不上紋綃織

橫書綾以

全端  
賜直書更有迴鸞字仰觀再拜千金賜預恐茅齋破

壁寒只應珍襲藏巾笥九華宮扇日邊來楚竹齊紈次第開明月烟銷香鴨動海天風起戲鴻迴十九年中被恩遇承顏往往親縑素畫簾雲章喜絕倫涼秋未敢嗟遲暮丹青自古誰良臣終始

君恩有幾人便蕃榮寵今如此恐懼獨立持其身

題王石谷山水清暉卷後

有序

王君石谷以畫名聞天下比侍

內廷

東宮殿下高其品誼書賜山水清暉四字蓋取靈運詩

中之義

廷敬

捧

睿書以觀欽仰久之謂山人何不遂稱清暉老人乎山人曰諾乃為賦清暉老人行云

清暉老人王石谷紫鸞曾傍紅雲宿醉翻東華祕笈文黃塵霜掃秋眉綠君不見洛陽郭恕先君不見富陽黃大癡古來謫仙多畫師石谷汝畫天人姿真宰開鑿初

淋漓烟雲欲落神龍隨鼠鬚麋角空爾為

九重聞之亟召見寫圖每覲

重瞳面彷彿凌霄夢裏遊不知身在蓬萊殿

承華日永問安迴寶墨書奩次第開揮賜謝家詩上句  
知君山水興難裁我聞一峰道人文采風流世無敵作  
畫半染君家虞山色彭祖巫咸皆輩行遊戲江湖不可  
測相逢夙昔若為情人間石谷留香名惜哉不以清暉  
稱誰為稱者午涯生

擬古一首寄林吉人

淥水湛明鏡照我青蛾眉  
幾回芳樹下蕩漾涼風吹  
思君渺銀漢洪濤浩無涯  
雙星雖迢迢會合歲有期  
不見機中人停梭感鬢絲

送廖衡素還雲間

蕭條邊朔心時節迫晚暮  
以我幽憂居思君在歧路  
平生困鞍馬不識江湖處  
懷情向南雲極目空烟樹  
繫艇及流潮春風信來去



送杜遇徐大宗伯致政歸樵李

玉京仙人侍

帝還紫清朝別暮丹山長風萬里留不得明河倒瀉隨  
潺潺金壺銀箭南宮漏尚書午夜遲箋奏扶桑弄影海  
雲生繚繞觚稜夢如舊遙思供奉西清日

詔試與君連第一柏梁歌就賦長楊琉璃硯水蛟龍筆  
我愧紅顏君少年相逢意氣凌雲烟白駒晚景真過隙  
綠鬢秋霜已上顛詞華勲業鄒枚老曹省功名塞夏偏

簿書往事紛填委文酒風流只浪傳君如阮嗣宗臧否  
不挂口我如王無功泥飲欲濡首我留君去天蕭蕭離  
心千疊江山高君過長蘆試相訪雞黍近局堪招邀

朱謂

竹垞

巢學士賢母歌

北門學士雙銀魚晨隨玉榻晝直廬有時惠我蓬萊書  
開函磊砢千驪珠上言母氏行凜凜與衆殊下言弱弟  
賢母教勤復劬朱門貴富世所慕孝弟為寶今有無又

言子之文可以式浮趨子為我歌歌以壽母餘流傳篇  
籍無刪除我感公言為躊躇母善累累不可以別區母  
昔佐夫子惟孝忠不渝公令昆弟升華塗移孝作忠理  
不誣參執魁柄爭斯須守母善行為楷模吾聞母言食  
君之祿勿使我虞賢哉母言真丈夫青史萬年名與俱  
福祿永綏神明扶

廣陵學士北征扈從圖

方花磚影日未紅相逢鸞珮均螭東臣朔空飽太倉米

頗牧驚看禁中蓬山仙官寂無語八牕雲開見下土  
清水蟾蜍咽玉壺紫塞胭脂卧輦鼓龍旌一捲沙漠塵  
青山黃屋相嶙峋神功如天難繪畫歸來高閣圖麒麟  
生綃別寫君年少橫槊簪毫皆入妙衰白對此意飛動  
掩卷臨風起清獻

飲酒寄荀少

老至顏復酤飲少興無涯前有尊酒行樂府名最佳呼  
童使之歌聲澀如秦娃昔者與諸季樵唱相謹譁別來

四五秋分散空荆柴遠或隔嶺嶠近或踰河淮君往官  
湘州相州水涪涪淶水可作酒飲之寬君懷飲水還飲  
酒歌此當優俳

出北郭門贈吳天章

月斜雞未鳴中宵塵鞅閒心清不染境眼明惟見山初  
日動林景和風吹客顏花枝自冉冉鳥語亦闐闐城中  
幽居者高眠棲闌闌思君共芳草青春偕往還

野亭對酒懷朱悔人

朝來公事罷客心靜無氛頗訝衰拙跡忝茲鵷鷺羣悵  
然一樽酒無由舉屬君褒裒且未去為近青山雲

午亭文編卷六

欽定四庫全書

午亭文編卷七

大學士陳廷敬撰

古體詩

李厚菴少司馬生日詩

紫陽起八閩斯文振千古夫子繼清塵鄉國近接武流  
風五百年名世天所許伊昔王道微儒冠賤如土紛紛  
霸與雄管樂僅遇主羸火照西秦遺經壁東魯其後稍

稍出寒芒翳復吐五星聚於井隱見豈再覩濂洛不逢  
時渡江况齟齬得如休明運龍飛當九五斂容陳周孔  
講學佐堯禹奎文移禁中兵柄攬畿輔民有耕桑居士  
有側陋舉封章贊廟謨兼多造榻語梧桐高岡音聲聞  
達九宇五色所披拂德輝蕩羣羽古來儒者流誰及文  
明普會當臨闔闔雲霄灑霖雨天壽卜人歡輿歌翻樂  
譜公聽旌門外千村連社鼓

送吳天章歸中條壽母歌



君不見太華山前黃河水山前沄沄走萬里崑崙之源  
天上來十二玉樓相向開丹山有鳥形如鶴王母騎之  
珠繡絡五色神龍班狻猊黃金茸茸顙形垂仙真羽節  
從所適小駐崆峒下姑射太華連綿中條長黃河之水  
流滂洋龍門結束玉谿古男兒不出亦不處有文萬卷  
不求名聊向京華走塵土仙人一笑子歸來黃河十月  
冰崔嵬太華不騫為母壽玉女金盆酌春酒

送桐城張相國還龍眠山歌

聞道龍眠山龍眠今不眠白雲從之去縹緲青冥天一  
朝噓氣生紫烟沾灑千山與萬川先生昔時此山居白  
雲出岫隨軒車自從雲去山逾靜春猿秋鶴相吟呼雲  
今冉冉歸來乎山前修竹林山下芙蓉湖水石公釣遊  
花鳥公友于曲江荔子嗟莫致成都桑樹餘幾株乃知  
賢達少儔侶赤松黃石差可夫且如白雲何山無龍眠  
之山山不如

朱悔人遊廬山觀三疊泉圖歌

五老峰邊三疊泉飛流三疊落九天誰其觀者前謫仙  
後有坡老差並肩邇來千載風流歇空使江山坐超忽  
建安已來蓬萊姿矯矯才名又清發見君朗如行玉山  
萬里卷入胃懷間手持觀泉圖颯颯天風還燕山雲動  
海月出照此令我開心顏欲騎白黿去銀河相躋攀倒  
身笑殺五湖水平流淺碧徒潺潺

上元即事簡湯西厓都諫

春山蒼蒼春樹綠月高起行月漸沒今夜元夜月應圓

曉月雖去夜還出我初擊筑北遊燕橫腰寶劍光可憐  
行向燕人問岐路易水清流古道邊歸來落日紫烟生  
壯心未已白髮驚遙看青綺門前月已度黃雲塞上城  
少年踏月瓊樓下清輝照耀銀鞍馬漏水金壺達曉稀  
袒屣歌筵與舞社只令閉門對月閒門前燈火高如山  
忽聞剝啄聲逾靜雲章五色投柴關撫卷摩挲揩老眼  
頓使少年看月精魂還嗚呼此月萬古長出瀛海裏此

詩萬古長留天地間

西厓示  
使黔集

紫毫筆歌

誰何磊落天人姿手捫星斗騎蛟螭長風萬里上閭闔  
玉皇香案親來隨彩毫掀舞墨花落鋪張霞綺褰雲旗  
昨朝示我筆精妙法從天授非人為龍跳虎卧勢宛爾  
紫貂穎力如熊羆文犀琬象式古雋朱網翠羽光淋漓  
會稽鼠鬚少牙角中山兔穎徒毛錐良工市肆皆則效  
都人四遠傳流之侍中直廬蒙

眷睐奎章雲翰常攜持囊中往往藏此筆黃封題字標瓌奇

貯以幽蘭含郁馥濯以清流開芬滋染以芳松之烟霧  
疏以端溪之紋漪邇英側畔青藜閣剡藤鶯絹攔烏絲  
誠懸心正存矩矱世南戈法多風儀丹青點染具生動  
山光水色心情移寫詩作畫無不適雅與此筆稱相宜  
無何惠我意則厚風流文采焉能追生花五色夢特異  
別管三品書難窺珊瑚為閣巧安置寶玉在執憂顛危  
君不見吳興承旨迹不泯華亭尚書聲方馳

至尊文思高萬古猶憐二子非同時吾屬幸生休明世

公乎努力當如斯人生遇合豈易得况逢

聖神為君師

野亭懷魏無偽

孤雲隨客來飄飄自舒卷言遵西山行不覺野亭遠微  
吟記獨遊憶我心所善魏生西山西關河阻幽緬

徐給事虞門宣沙視牧寫真

邊沙夜靜晝不昏長城不鎖開關門時清歸馬天山下  
千匹萬匹如雲屯宣沙千廐尤最盛考牧攻駒得雄俊

誰其典領坐致此臨城長官亦縣令使君今為掖闥臣  
風貌奕奕愈有神肯信書生事鞍馬故爾寫真傳後人  
更畫此圖著省壁青瑣花驄照夜白就中八尺生有神  
怪底龍池飛霹靂

書江補齋太常江山覽勝圖

我聞漾水出崑崙禹所導漾非其源東流為漢走萬里  
仙人黃鶴隨孤騫黃鶴樓空逾千載黃鶴高飛至今在  
漢水東流無盡時朝發閬風暮碧海青霄宮闕渺何許



身到紅雲最深處不知經歷幾春秋還憶江山汗漫遊  
大別山滄浪水今之畫圖得無似掀髯英盼夫為誰仙  
骨驚人見吾子吾子巍巍廊廟姿寄興烟霞聊爾耳  
玉宸朝退凝清香江山一片空明裏

九日贈同直近公聲山

玉宸俯清都高處閱九州何暇尋遠山蕭條增繁憂瑣  
牕過白日坐對黃花幽兩賢真好我語默皆綢繆始愜  
絕紛擾遂欲恣冥搜耳目寡外緣一室安天游翻念登

高人徒令日暮愁

野亭望西山

青山有何好望之開我心我心含虛空豈受谿壑侵奈  
此前塵影鬱若交蘆森明鏡鎖匣中清光寧久沉一見  
青山色豁然愜幽尋

再哭孟孫

三月廿一日

我老夙少歡奄忽遭深悲皇天豈私酷要是業所為淚  
流輒復咽焉得成綆縻我生實愚癡衾影恒自持魔事

與魔民侵陵無盡時此心痛自恨克己將尤誰汝去逾  
半載執筆為此辭汝則聰慧人去去慎所之

歸詹事孝儀畫像

鳳鳴時一聞窅窕千秋長飛鵬上萬里重霄閱其光喈  
嗟天下士有道不得行丹青貌顏色攬圖神揚揚此中  
含誠明可以為世坊詞林枝葉大根柢誰持將風輪激  
海水日夜沃扶桑自非此理存斯文得不亡偉哉桐城  
公管領翰墨場春雲靄萬卉高議無否臧有時屈一指

詹事傳芬芳昔余知詹事公實告之詳所得副所聞歷  
久彌煒煌自聽山陽笛感舊猶沾裳公令謝政歸雲卧  
龍眠莊詹事有賢子繭足陟澗崗乞公一紙書細字森  
琳瑯上言陳

主恩歲月游虞唐下言叙友誼斐然及文章謂非子一  
言實至名不彰余昧作者意念古徒傍徨七哀難可繼  
一慟有餘傷紀事畏掛漏選詞愁倉皇惟賢故知賢舉  
綱目以張以茲示來哲筆簡情無量

題汪東山寫真

聚奎堂中二十夕  
闡棘森如背芒刺  
况復冬烘鬼眯眼  
老夫耄矣嗟狼籍  
座中汪君壓萬夫  
手握隋珠奪秦璧  
文采風流貌有神  
蛟龍欲落搖空碧  
筆陣橫掃詞源傾  
斂我精魂壯心魄  
散若風雨飄雲烟  
聞君將泛五湖船  
衡門兩版晝常閉  
剥啄過我生無緣  
我時早出歸在夜  
軟塵漠漠吹華顛  
當歸不歸歸未得  
君歸卻是當少年  
丹青畫出好顏色  
攬圖對君猶依然  
我留此圖君不可

回首春時院空鎖君是名場第一人來乎來乎思致身

舟行

舟行迷南北杳杳信所適但見東月生銀灣落帆席回  
首軟紅塵車馬倦行役及茲稍休駕涉境喜地僻浮家  
欲恣情羈旅畏滯跡遙看江鴈過高舉雲中翮逝將跨  
黃鶴觀海先碣石

風泊沙河

玉杓指東風聯綿送遠道留帆潞河水冰漸欲盡掃舳

艫行稍遲雲山歷更好微茫平沙流出没迴巒抱仰視  
圓月高俯覺衆星倒六鼇奠坤維四海際蒼昊且欲觀  
長江未暇覽絕島從此涉波濤忠信以為寶

放棹

水宿無常程春氣今日佳篙師喜相將放棹河之涯一  
自發京輦登艫願始偕復此美烟景良辰天公排岸轉  
捷飛鳥樹過迴奔騶初或礙淨目久乃增竒懷物象雖  
有變蘊真無所乖君看六幅蒲何如十二街不動而謂

動長年來俳諧

舟中題李龍眠畫佛像歌

龍眠畫佛誰可摹大等須彌細入無三十二相信有諸  
一相本無相乃殊千幅輪文雁王綺紺青宛轉珂雪俱  
耳門三昧詎易畫廣長之舌聲難呼平生說法不閉口  
一字未說驚萬夫師利再請遭佛詬清涼臺寺歸來乎  
居士作詩說法如以詩觀詩堪盧胡船牕水急日已晡  
微雲澹月光模糊高卧卷卻龍眠圖前塵分別心不孤



天津北分水處放舟南行二十里夜泊

漾舟今始佳  
分流波轉急  
津條近堪攀  
水華俯可拾  
落日滿孤帆  
餘霞帶輕楫  
鄙人耽幽懷  
夙昔寡遊集  
得此稍自娛  
風景亦屢挹  
采綠雖不盈  
臨川每獨立  
見月仍尚圓  
計日忽欲十  
慎持中夜心  
無使百憂入

靜海弔勵近公侍郎

公昔侍禁庭  
惟余日月至  
桐城解機務

勅蚤暮勿離無  
何公卧疾池  
亭鬱把臂迄  
今行旅間凜

凜佩明義初發抵津南靜海吾所志仲春九日夜

宣召御舟次大艚換小舠輕風緩遙吹雲月互蔽虧漁  
燈照一穗丁東漏水聲旌門屢顛躑

玉音下已久

至尊坐不寐謂言公慎勤卅載獨勞勩今茲臨故居  
天書寫獎願閣臣偕禮官議賜以令謚嗚呼公精誠更  
僕難徧記夜分始迴船鳴雞覆奏事

詔曰汝議可文恪標朱字

大恩潤羣萌露雨灑蕉萃我衰如柳蒲本根幸蒙庇飄  
飄玉墀傍葉稀恐失墜日斜龍尾道顧影却欲避春流  
遶山溪吾生亦浮寄宿草何茫茫三年數行淚遙酌一  
卮酒匆匆絮難漬

晚泊青縣懷勵文恪公

山陽笛裏聲淒斷  
人去遙遙河上帆  
渺渺烟中樹回首  
蓬萊宮高話滄洲  
趣何處君釣遊遠  
道猶返顧

滄州微雪

河曲連烟村岼古鬱沙柳蕭蕭蘆荻花猶灑秋風後是  
時當春陽潤色上隴畝雲師豈無意滕六初試手微雪  
映鶴跡橫靄薄鷁首我行適江海臨深堅所守欲舉湘  
沚芳不醉滄州酒

望中條懷吳天章

條山蒼河水黃陽城諫議不可作白雲終古空茫茫滄  
州已過官河長時清無事容徜徉我思昔人遙相望隱  
淪更訪河之陽高達夫劉文房二子此地曾頡頏蒲東

佳士吳天章新詩可與二子當此去中條踰千里高才  
秀士知有幾吳生相近玉溪村千旌若賁事堪論

論晉中詩人懷天章

摩詰秀千葉柳州儼天人義山最崛起流別自有真上  
下五百載遺山接清塵自餘諸作者海山羅奇珍嘗鼎  
分一臠已足甘喉膺鄙人老無學粉榆私所親豈惟鄉  
里賢名與天壤新我初慕聖道矯首思河津緬維三千  
篇刪述垂千春大雅久凋喪風流隨波淪昔者卜子夏

論詩河之濱沿洄溯洙泗餘潤沾窮鱗文章寧小技矩

矧存先民以茲慰衰晚奮翼攀鳳麟既得金鷺子

金鷺子  
天章

齋名刮眼辨玉珉子居玉溪上義山舊卜鄰况復龍門峻

宮堯臨高旻執鞭令所願參駕豈同倫虬螭與大樹天  
賦理則均撼之適足笑安分不失身扁舟阻千里寸心  
無由申所期鄉國間詩教還清淳

武城

行行慕往跡况復聖所至此非費武城昔人以名識而

我以其名寫此流覽意斜陽望極浦風帆渺河湫當時  
河未鑿絃歌繞平地雲天故如常陵谷不相似我來情  
實耽恐與曩者異覩茲屢怊悵悠悠起遐思轍環齊衛  
間西邁見簡子趙氏殺鳴犢臨河阻風義鄙夫本晉人  
卅角知醜耻我生謬好古千秋有恨事今此入征途顏  
垣傍沙水猶幸一笑留聖目所眇視誰謂沮溺賢滔滔  
同一喟

穀城山在東阿東北五里

子房年少時擊秦博浪中亡匿游下邳折節圯上翁期  
後十三載相見穀城東伏臘祠黃石此義千古雄昔夢  
黃鶴客綢繆蓬萊宮亦有山澤約俟我乎河嵩河嵩不  
可到穀城訪遺蹤扁舟渺然去但見烟濛濛

觀汶水南北分流處

昨行天津北汶水東流出今行濟寧北汶水西流發西  
流來不近及此初蕩潏南北忽分流北三分南七投木  
柿試之其數不一失悠悠百年後此豈有牽率緬想開



鑿人用意必祇栗憑之儼有神不匱復不溢利涉通湖  
江倉庾衛京室盈盈一水間伴我已廿日往路幸相從  
溯洄猶未畢有情若汶水生理向君說老夫今老矣往  
往情懷惡晨夕亦已久君應悉本末使我飲水心即事  
自欣悅

分流水送人北歸

分流水流濺濺行人到此寂無語別淚滴作分流泉我  
行南來幾千里多情送遠北河水北河相送去茫茫南

河相迎客路長與君相別分流處春草春花易斷腸

魚臺東境山水

好山過客不知名好水圖經不入選我行魚臺山水間  
輕綃半幅平如剪連峰依人行欲近翠嶺橫天去復遠  
山青水綠畫新就道人宴坐却掩卷東行若更見麻姑  
不問蓬萊水深淺

湖風行

獨山微山東兩湖獨山光淨平練鋪微山宿雨春模糊

侵曉衆皴堆不舒初猶料峭成崎嶇既乃簸揚塵漲途  
神靈卷舌帝命敷大塊噫氣噓焦枯誰令如雷聲如呼  
搏鵬退鷁奔天吳下逮水鼃鼃龜魚魴鯉魮鱣鯪  
潛形息影四散逋罾網雖設愁三虞行人高卧棲艦艫  
守湖使者前相於為言船行牛酒俱益池肉屯神其娛  
我謂飛廉盍少徐錢帛已空單衣襦葷血不飽甘藜蔬  
村醪十日一懶酤神之清潔凌太虛飡霞吸露奚啻餉  
我斟河水莫滿盂生民正直神所扶作歌反風在斯須

歌殘雨來帆影孤

汾河詠雪

春寒不歸柳欲催輕烟蘸水如青苔宿麥在隴色自好  
農夫荷耒爭黃埃河水沄沄可灌溉我欲手挽東流迴  
惜哉老耄身無力雲師風伯多見猜龍公作意初試手  
映空小雨行裊裊土膏沾潤拜明惠縱橫忽訝紛瓊瑰  
資清以化本天德夾鐘之律猶飛灰表賀瑞雪吾豈敢  
詩詠豐年亦快哉

淮南放舟抵金山作

太行窈窕穿林麓千里相隨到京國我本崎嶇山谷人  
泛泛湖河望平陸人生無奈是有情流水青山憶茅屋  
十日見水不見山今朝喜見三烟鬟船頭低昂如有意  
招我紫金浮玉間忽焉江天萬里豁丹青幻出峰巉巖  
鷗鵬搏風乍羈紲龍象截流猶崢嶸潺湲靈巖湧出多寶塔  
隨身宮殿忘却還帝釋冥搜巧施設豈同工力煩人寰  
廬山面目在山外此山在水尤孱顏天下江山難徧到

得此已足栖幽閒故山有夢不歸去江神抵掌笑我頑  
惠山泉和東坡追用唐處士王武陵竇羣朱宿所

賦詩韻兼以泉水貽桐城先生三首

昨夕發京口不踏焦山蒼今夕過惠山不登漪瀾堂昔  
者蘇夫子鸞鶴空翱翔邈然下江海泉水流雲光虛明  
見何色清淨聞何香令我亦栖栖塵影豈易忘

水行亦近山清暉相娛人湖江去浩淼巖澗來幽新吾  
生亦聊爾與物無緇磷性僻耽佳句道遠泥客塵夜來

濁水珠皎皎凌清旻永言沿餘波猶冀德潤鄰

殘紅亞山坳微綠散林樾夙聞此中泉色味稱兩絕遣  
舟取一壺蕩槩烟明滅去山亦已遠傾水瀉山月眷言  
臭如蘭佳處相映發分甌隨清波川行靡定轍

南園贈彭訪瀛

我行泊船來胥門銀濤日落昭關昏短衣走馬蘇臺北  
迴鞭忽漫思南園南園近在故人舍剝啄相驚喜復訝  
開軒掃榻具盤飧二十年中一夕話酒闌燈炮夜何其

月出涼風吹白髭  
荏苒海山歸去路  
淒迷林壑到來時  
海山林壑差相似  
南園閱盡興衰事  
金谷花凋蔓草生  
平泉石散孤雲逝  
吳越舊國廣陵王  
此地豪華擅一方  
辛苦為園逾一世  
美人詞客盈高堂  
前有麋鹿後狐兔  
元璚那復蹈其故  
如今亭閣盡埃塵  
菜圃紛紛野烟暮  
君家結屋數茅椽  
歸來手種南園田  
吳中相識亦無數  
與君似是前生緣  
六日淹留不欲去  
臨行執手心茫然  
吾生有涯知無涯  
為我試問南華仙



滄浪亭次歐陽公韻

清水濯纓濁濯足  
竭來高詠滄浪篇  
歐子吟詩跡不到  
我今遊目亭依然  
應知結構存古制  
故令閱世如循環  
喬木已疎閒弄影  
襟花交映春爭妍  
冷梅苦竹亦間發  
時有百舌來啾喧  
蘇君在日不得志  
精魂此地棲雲烟  
我生幸值休明運  
不應與子相夤緣  
嗟予賦性慕放誕  
一枕喜遇龜茲仙  
十洲三島不可望  
天留老眼湖江邊  
公乎避讐如避寇  
雒陽豈無二頃田  
蒿丘萬古疊蒼翠

洪河清濟波淪連賢妻孺子飽蔬食那肯浪用公紙錢  
惜哉與時自齟齬凶人怒天須憐人生有命天所定  
屈申未了還聽天水清水濁源自異如金在沙玉在淵  
鬱於生前昌厥後回頭萬事輸醉眠自昔遺臭甘百世  
流芳故自經千年我來弔古君識取惡詩不用人間傳  
長水道中重題滄浪亭懷宋牧仲中丞

昨吟滄浪詩祇作滄浪觀滄浪見野老語多頻襍亂短  
歌欲申寫挂一定漏萬謂言滄浪亭都堂公所玩公來

活我吳百事費廉幹此亭幾興廢排牆亦畫墁公暇求  
古跡文字並堂按悠悠一千年人往亭亦換公曰但因  
之勿令滋漣漫作無侈前模成不張彩幔錢財出食餘  
俸祿計口算又言我蘇州正賦天下冠賦外曰火耗似  
是治與鍛不知始何年長吏恣壠斷始初輸一金四三  
分兼間後來至七八實重吳人患公曰悉除之無已稍  
及半猶然四三分亦可足私便人生堪俯仰何苦慕富  
羨大哉仁人言境壤謳歌徧是時行舟急野老相追餞

殷勤再四語春鳩相鳴喚細雨荷鋤去枝詞為點竄回  
望滄浪亭旅泊客遊倦請公聽此歌諒不謂河漢

自靈隱至韜光菴

靈隱之峰世所稀天巧不煩人施為誰與妄者久雕鑿  
我今來遊長嗟咨藏嵐洩雲故宛爾徒令汝輩尋刀錐  
冷泉之亭蹟最古青松危石梁可數凍能墮指當炎熱  
深始出淵連厚土我今衰顏時復寒對此翩然欲霞舉  
為問此泉可飲乎僧言衆水泥塗俱接竹連筒致山水

山上有泉如噴珠徑隨水道覓往路新篁紫籜森扶疎  
韜光之寺餘杭無浙江滄海巖前鋪斜陽不見海日出  
輕烟遠覺江潮孤江潮海日常時在行人速去山靈怪  
仙客何須歎寂寥客堯自與神明會雪山葱嶺杳何許  
渺渺恒河亦溝澮江山歷盡好安禪只恐茲遊不可再

雲棲寺

湖亭賞未愜言尋山寺幽巖溪杳微徑忽見長江流隨  
潮送遠目島浪海氣浮天開豁遙想路永生羈愁崖花

方爛爛野竹何脩脩臺殿稀壯觀雲霞媚林丘道人棲  
此山了悟空中漚吾茲佩遺教息心將焉求

婁東道中次韻西齋題夏重初白菴圖

行行江樹驕春風誰識秋風待枯槁婁東美人青瑣客  
溪外落花紅不掃朱顏如渥鬢如漆亦解人生有衰老  
查田居士金閨彥心寄山林事幽討竭來畫作初白圖  
不將宴坐離煩惱吳生有文能達觀弄筆吟牕展懷抱  
白髮白盡與初白所白不殊見顛倒縱道長安多少年

富貴何須致身早感君清興寓瑤篇一為勞人慰草草  
查田漠漠望如雲征途不辨方與阜有似前年鎖院時  
看花時節冬烘腦初白之名名最佳白盡尤知白髮好

四月三十日龍見於金山

余月月夕明欲蘇金山傳漏方午餘微波吹江江水舒  
靈風歛吸雲四鋪蒼龍挾雨光有無濃靄畫出一縷麤  
自南亘北橫天樞度之十丈長自逾圓徑數尺不可摹  
白雲周遭中模糊我未見龍誠有諸同時見者皆呀呀

指點似有鱗爪俱倚空流盼爭斯須儻恍自北而南趨  
斂形就小尾不逋搖曳撇簸重雲膚天晴日晶景氣殊  
吾聞龍者德之符感應和氣遊沼湖自從羲皇河出圖  
榮光休至當有虞舜東巡狩龍當塗五彩負卷留舜車  
爾後寂寥栖八虛無聖則隱見不渝漢皇有道來不誣  
及其矯偽分龍豬吾

君聖德同古初神靈表瑞盈亨衢作歌紀祥徵策書塵  
埃載筆愧雅儒



與虞良

嗚呼三千篇什一今尚存宣尼絕韋編於此尤討論好  
古述不作精意探化元我衰才思劣歸老道德源滄海  
不可涉沿流競追奔日暮失津涯賈涕流潺湲吾子誠  
賢哲夙植詞林根竭來二十載風雅方騰騫樂志尋孔  
顏放意遊羲軒願言共晨夕相對各忘言

惠濟祠觀河歌

桐柏之山兮高峨峨下有清淮兮汎濫多浩浩洋洋兮

殫為洪河殫為洪河兮浮鑿桑走臨淮兮騰維揚使淮  
水其安流兮河弗逆經之營之兮匪伊朝夕烏用白馬  
兮湛玉璧駕飛龍以周遊兮指舊川以為期彼滔滔兮  
來迎澹容與兮河之湄荷蓋兮驂驕登東陸兮遐思攬  
日月兮時正中奠四海兮將焉窮

蜀山

廣陵亦屢宿不到平山堂蜀岡如夢寐歸來心傍徨蜀  
山山磊磊蜀山湖洋洋蜀山萬丈青城長花明玉洞雲

錦張峨眉插天兩相映仙經地志不可詳此山似是巨  
靈開鑿時殘峰斷嶺分攜將東置汶田西維揚汶水連  
綿浩淼茫灑作雲海東邊窈窕色巘岫噴薄天門傍天  
門高高日觀遠我欲登之日已晚此山此湖難久留丁  
東玉漏催方舟仙人騎羊跨白鹿雲中笑我來遲去何  
速空負青霞賞遙謝紫芝曲朱顏白髮已如斯歸向茅  
堂卧幽谷

西齋遊城西南詩三首余見之因亦往遊焉次韻

有作

呂仙祠

訪古悵秋城尋幽快仙閣  
即無黃鶴飛時見白雲落  
未能餐烟霞且欲飽蔬藿  
天人不可攀三復岩上作

黑龍潭

蕭蕭蘆葦花奈此涼風夕  
沙水入秋清松雲近潭竭  
來見海眼神龍所窟宅  
頻年禱祀稀憫我田畯厄

陶然亭

野水延清暉寺亭豁遠趣煙流鐘隨殷裊裊落石樹聲  
聞竟何歸塵影此暫聚山僧習辟支吾向大乘住

題牧仲冢宰西陂魚麥圖

去年相別滄浪亭春水綠波春草青今年相見長安道  
西華夢想西陂好西陂烟水似滄浪我欲從之路阻長  
誰料軟紅香土裏幻出雲山翰墨場披圖最有江南意  
春月春風滿巾笥五湖三畝未歸人紅欄綠浪經過地  
滄浪野老別來久瓦盆酌酒為公壽想見攀轅卧轍情

棠樹村村間花柳藤陰兩株今作家扶桑萬疊影不斜  
回憶西陂此時節釣魚刈麥荷有花鏡湖一曲天所賚  
也待行年八十外潞公未老魏公壯高會耆英且莫讓  
因安溪先生寄梅定九處士

待漏院中清晝長安溪閣老來平章公所薦士不可數  
宛陵處士尤芬芳梅君好古懷軒唐胸羅七曜包八荒  
御舟三日三召對懸河東注河伯忙老笨多時語屢誤  
聞此不覺神揚揚又聞日坐

玉座傍龍箋捧出星日光賈生一見便前席劉洎何勞  
登帝牀丈夫遭遇有如此稽古之榮世莫比白衣宣至  
白衣還他年正可書青史昔我與君俱壯年交親氣概  
迴雲天職在論思不能薦忽忽白首空徒然耆舊飄零  
萬事畢新知記一不識十如君幾人王佐才

聖朝優老令歸來我今時節已晚暮江湖魏闕心悠哉  
人生會面難再得短歌長吟淚填臆若附音書寄李公  
為道良時須努力

中條行

金吾將軍八十餘直入延英門上呼中條山人事得已  
貞元亦是明天子我望中條思諫議小事不言言大事  
延齡奸佞陸贄賢外人皆知天下傳九重深閑不得見  
人言不信誰敢言金吾敢言帝肯聽一朝忠蹇回唐天  
山人昔在中條久窮達於君亦何有終南捷徑誰爾疑  
犀首無事但飲酒泉石烟霞世豈知折檻披鱗時亦偶  
千里中條日暮過迢迢回望舊巖阿秦山渭水不可見



白雲青靄空復多

登舟酬別宋牧仲太宰

御溝屬瀛海馳道連大川  
流漸及晨潮解纜春風前  
湖江渺萬里似攬崑崙源  
巍巍居崇高下念臨深淵  
羽衛靜無聲波濤平不喧  
息慮寡朝謁離羣曠周旋  
既慙隱淪樂尚慕肥遯賢  
別意方超忽贈處昔所敦

維舟懷朱竹垞潘稼堂

河關渺吳越一水行可至  
吳越有故人天遠浮空翠  
登

舟夢見之明月照不寐老將歸田廬荒山寡車騎悠悠  
川路閒此行

上所賜海潮動逸響津樹饒野意極浦來風聲枉渚蓄  
春氣永懷期明發旅泊展遐思

河間道中懷阮亭

陶謝吾生晚斯文阨橫流非君展心目千古誰冥搜結  
交四十載往往異沉浮京洛雖夙好雲山復悠悠及茲  
事行役聊為千里遊南浦草未綠青門柳色稠息軌陸

塗疲鼓枻川路幽未愜隱淪想每懷離析憂遠烟生海  
樹孤月隱河樓懷人渺晨夕瞻言此夷猶倘惠瑤華音  
庶以永綢繆

河間道中

劉隨州故里

瀛州百里路五緯生寒芒東有高達夫西有劉文房高  
君不坎軻劉君遭謗傷更憐二子名差異無定千秋翰  
墨場惜哉二子生同地聲華並美誰能繼善善欲長惡  
惡短况復文章一小技我趁輕鷗刺船去隨州杳杳知

何處可堪蹭蹬向時人得意猶為草頭露寂寞悠悠身  
後名為君三歎傷我情相如同時子雲老蒼茫掩卷涕  
縱橫

南皮道中和京江先生楊村旅宿與客譚江夏郭

侍郎舊事詩

伊余侍公下天漢桂舟容與海西岸敢云千里結同心  
自顧凌風矯短翰竭來惠我楊村篇孤篷日上流餘綯  
清文迢遞引芳音陳迹蒼茫起遐觀昔者遺腹華奎兒

孿生兩兒事並奇楚王無子乃有二何怪悠悠道路疑  
楚宗奏上不得入楚王辯章恣抵牾中朝貴人習省事  
樂取軟熟誇嚅唳江夏侍郎勵風操居是邦也行則危  
但請勘王跡自白大義炯炯世所知親王不勘是何語  
四明一言兼八疵侍郎竟刺扁舟去舟膠凍水河邊住  
妖書告密何紛紛北寺南衙莽錯互金吾緹騎夜如飛  
十口孤村墜霜霧百年青簡誰為編焦園遺藁猶如故  
覽公新詠一高歌弔古懷賢寄興多杜若洲長烟樹遠

相從無奈暮愁何

吳橋道中題劉隨州詩寄查夏重

望望東陽城曖曖將陵樹我慕劉隨州清詩美無度此  
地颺蛾眉同生逢妬婢惜哉後來者耳食狗好惡非君  
誰與言佳期不可遇行行已晦月離心馳永路長川雖  
慙娛大江欲飛渡故人來何時春水悠悠去

德州道中寄繆虞良

前年共君來吳地芳草菲去年送君去燕山木葉飛今

年此懷君春帆凌浩淼燕山在青霄吳地限江表雲中  
岱宗出天際黃河流嚴程赴長淮王事有淹留儻入京  
口船應泊楓橋夜南園昔所經高齋榻可下曙牕語烟  
禽雜花滿故枝君其尚能來正及前年時

水宿

水宿谿渚幽晴暉入枕席何異巖棲時夢醒一畝宅雲  
雁去屢遙沙禽方自適散帙坐清曉塵務罕見迫願言  
謝朋徒從此解纓舄暫陟泰山高欲訪勞山僻仙人豈

我欺我名挂玉籍縱未證無生亦復往息迹千秋幸若  
斯結歡慰于役紛吾慕遠遊沉憂竟何益

白雁行

我有錦字書欲寄歸鴻語歸鴻入雲長超忽不可數前  
行雙白雁眼明梁可覩實秉皎潔姿非因霜雪苦一雁  
俄後飛單孤不成侶本欲託音書翩翻自無主將書置  
懷袖淚落三春雨

南旺分水行



導淮桐栢會泗沂東流於海禹所治趙宋黃河決而南

淮與泗沂兼併之河於中土一大物况挾衆流行恣睢

爾後六百有餘載多為世患違津涯吳艘越舶亘天來

神京陸挽人驢疲偉哉潘生伏下職建言為國陳良規

濟寧同知潘叔正  
建言開河通漕運

宋公舉事不漫浪

宋尚書禮

下采羣策褒

參裨是何老人白其姓厥名曰英超等夷銅壺倒影測

累黍玉尺量地窮四維

老人白英  
建策分水

河灣接流二十里北

走千里誠一奇我行南旺分水處此豈地利皆人為百

川朝宗盡東下却與西北浮雲馳君不見漢漕山東百  
萬粟更歷砥柱多險巇又不見唐挽江淮道汴洛濁濤  
惡浪紛追隨泗沂實與汶水合禹跡不湮勞川師洪河  
德水寧有二細流不擇成大陂古來萬事亦如此短歌  
微吟風漣漪

次濟寧有憶

漕水向北流春草日夜綠今朝水南下綠草連湖曲湖  
波淡淡草萋萋北去南來人解攜臨風欲采芳洲寄歸

雁何由到隴西

仲家淺望嶧山作

言過仲家淺仲廟河水傍嶧山對廟門  
百里來青蒼影連初日動勢接春水長  
遙峰插天漢空翠分嵒岡不覩泰山尊  
爭長雄東方歛吸亘南戒逶迤趨西疆  
豁然去欲無林巒鬱迴翔掩映仲子廟  
千禩嶧相望我茲在川上漾舟涉微茫  
前浦行脩途未登洙泗堂生不逢孔子  
日月依未光扣舷問漁父夕照明滄浪

古意二首

春草隨長陌年年著舊痕教人歸未得且莫怨王孫  
單飛不作行單宿不同處記得雙宿時前年舊洲渚

徐州道中二月十五夜月

一身為太虛明月在其裏天邊見明月太虛復如此  
仲春三五月宛是前年明明月不改色所見有虧盈  
泊舟清口凱公學士惠以篇什即事有作

淮水生桐柏及此勢屢變金波帶餘霞翠紋迴淨練烟

深色逾澄夜久光不眩滄滄已朝宗滾滾復春見持此  
皎潔質得與潢汙薦眺遠意少悰撫景興寧倦一身為  
虛舟孤懷託才彥秀眉揚芳風清言發雅倩高文迴朝  
列新詩廣篇翰思君如淮水千里纔未半淝水出其側  
百里日已晏上窺河漢流下照星宿爛夕靄辨經途晨  
暉戒申旦稍知達人心聊同性所翫

渡江見焦山有作懷林吉人

江流近海迎朝暾焦山蒼蒼當海門憶君焦山古鼎篇

勢凌海日傾江源金山樓觀特瑰麗撞鐘伐鼓風濤喧  
我行再過焦山下海雲堂中空夢魂茲山不到屢惆悵  
懷慙竟踐蘇公言惟我於君亦如此知禰不薦昔人耻  
只有思君日夜心長江湛湛東流水

登報恩寺塔

大海漚滅無虛空多寶古塔何獨雄金陵南郭長千里  
高標屹立滄江東昔遊不到去惆悵使我情想紛難窮  
浮生萬事皆顛錯更堪筋力枯秋蓬眼明忽覩琉璃影

陡覺兩翼搏長風捫星歷斗涉清漢彷彿似已凌蒼穹  
吳宮晉代那復道三山二水烟濛濛曼陀優曇灑香界  
野花閒草徒蒙寵夙觀勝因悟淨理身雲湧現空明中  
諸天龍象亦偶爾豈與人世爭沙蟲登臨浩歌日欲暮  
歸途且逐春塵紅

惠山泉

青林欲斷蒼山起山色沉沉出泉水散作清暉百道飛  
遠暎千船萬船裏急呼雙槳快幽尋清賞迢迢愜素心

溪邊蘿靡披瑤草石上潺湲寫玉琴我行吳越千山道  
春山處處流泉好玉牀金井紛徒然一酌清泉可終老  
山僧知我再來情汲泉遣致雙瓷瓶黃泥赤印漫天下  
見此雙瓶信可憑龍團手試清漚發引滿浮空對明月  
七椀一飲不盡興夜來少睡心惛惛摩挲雙餅為三歎  
我自愁多豈汝怨提攜珍惜向故山折脚鐺中煮粥飯

石門舟次

桑葉綠溪陰映我孤篷去飄搖楊柳花千里隨來處及



茲契幽情那得問新故柳條攀更生桑枝亦已附物理  
信有常人意莽更互超忽不可尋沉沉戒往路

武林歸舟懷龍眠先生

前年同宿浮玉山海風吹月照別顏蓬瀛縹緲不可到  
大江東流去不還今年相別闔閭城寒烟漠漠春水清  
滄浪亭上白雲古古人令人無限情歸舟一夜武林道  
夢回枉覺湖山好老去那能五岳遊茆檐竹簟自悠悠  
不買蘇卿二頃田不構元龍百尺樓一邱一壑足游釣

摧眉折腰謝年少短歌聽者龍眠公緱嶺仙人獨長嘯  
平山堂

我浮大江來迴望江上山山遠翠猶送江去潮復還江  
山遮明滅暝宿茱萸灣訪古平山堂水竹清心顏遂登  
堂上樓江流山色間是時夏景殊雲峰爭烟鬟歐公千  
載後何人共躋攀風流寄欣賞寬簡蘇梵鰥豈惟雄文  
字實將激懦頑門前清渠水至今餘潺湲留題渺何處  
似有墨痕斑

夢太白五月初六日作

太白天上人入世思沉冥昔過酒樓下扁舟繫客情昨

夜忽夢公千載猶崢嶸花月十年醉聲名一日榮

十年花月

西園醉一日聲名北斗高予庚午歲夢中所得句也

此義我贈君出處亦甚明年

至不歸去惜哉身後名風雅亦細故所患在有生無生  
斯無死天人渾一成餘語不可悉孤篷急晨征明當過  
酒樓靈爽使人驚

魯郡南泊舟寄龍眠先生

龍眠公龍眠公長江與子分帆風君向江南歸我向江  
北去別時雙纜解流潮潮迴不到長淮路微生著處如  
浮烟那惜飄零眼江樹舟中得病萬慮空十日卧渡黃  
河東感公勸我舒懷抱有同慧日開愚蒙人生踏地莫  
憂老兩脚能行便是好此言未寒吾已踐為樂從公苦  
不早泰山高滄海深鳳歌邈矣不可尋穀城黃石圮橋  
水千古惟公知此心

汶水舟中寄阮亭

朝發濟水南暮泊汶水東思君如流水日夜隨征蓬征蓬雖泛泛所歷物象雄遙望秦嶽雲孤撐摩蒼穹瀕洞出遠岫飄飄乘長風灑然忽歸來星月相朧朧卷舒亦何心託興將無同尤憐汶水淨清波映玉虹解作西北流千里浮烟空縱復雜行潦皎潔含冲融低徊赴滄海意若無成功奔淥謝衆壑浩蕩將焉窮對此感離別與子期鴻濛

題寄齋尚書雙松五桂圖

公才天所篤矯矯凌雲姿班朝面槐棘青春貫四時紫  
薇間紅藥香與清風吹而我攬此圖霜幹含芳滋喬松  
表遐心粹然君子儀嵩高千丈齊百木紛離披下蔭丹  
桂花松前開五枝譬彼芝蘭秀玉樹連軒墀畫師巧用  
意根葉相猗猗達人體造物至德通皇義雨過長卉草  
陽回傾藿葵功宣化自洽感此動植知公其佐鴻鈞斯  
理更不疑桃李豈有言成蹊如路達一唱松桂篇或可

絃聲詩

蔣南沙宮贊畫紅牆下小槐樹

飄飄塵外跡清賞寄草木迢迢紅牆陰芳樹騁幽矚天  
秋衆卉凋見此生意足風葉留餘暄霜餘灑新綠瑣牕  
展書人寫生盈簡牘委身垂華纓結念同林谷持畫對  
芳樹宛在山澗曲

題林吉人北阡草廬圖

草廬之圖雲龍蹲下見閩海橫飛翻海山隱顯走萬里  
出沒日月旋乾坤開闢以來莫鰲極漢家拓地秦東門

自東以南海氣昏扶桑弄影萬象吞流球南交可指數  
十步五步如烟村天作崧高東鼓山勝概如此難具論  
林生惟嶽降有神矯如威鳳初騰騫德輝遠覽翔欲下  
裊裊返顧西山樊松楸鬱鬱松榆古歲時伏臘陳樽俎  
築堂丙舍兼家塾絃誦殷殷答石鼓漢家寂寞東西京  
二十四帝無抔土生也邱墳四百年名流輩出繩其武  
君不見劉郎石馬泣秋風相如凌雲氣如虎

半日村以詩代書答張麋田

白東谷先生嘗盛稱  
張門前芝草鹿麋田



之句因遂字  
之以麋田

朝謁得幽蹤遠心展阡陌袖中一紙書清言想平昔門  
外鹿麋田千里在咫尺芝草秀歲寒元氣肖翕闢蘿薦  
因風翻靈根詎蕭槭已從白社招孰假元纁辟悠然人  
世寬不覺天地窄念子如孤雲託以桑榆夕

尋暢樓詩為吳孟舉賦

南國有佳人高步凌太清周覽四荒外延佇臨層城層  
城十二樓一樓何亭亭迢迢若木枝拂我東簷楹銀河

水清淺欲落當牕橫散為三江流下與吳山平還顧蓬瀛間海月灩灩生登茲俯百川上月俱明我心正如  
此皎潔含至精春月與春風四序相迴縈伊昔邁嘉會  
歡言邁羣英客亭載酒時題樓聞令名厥名曰尋暢此  
理可服膺別來四十載宛爾歲寒盟松柏千年姿寧羨  
桃李榮彼哉塵壒事邈矣浮雲情持用祝眉壽諧之金  
石聲

三峽流泉歌為曹鍊師作

惜哉高漸離燕市擊筑徒爾為却笑陳梓州瑤琴椎碎  
求人知老夫埋名燕山陲有客抱琴請賦詩自言此中  
可度世三峽流泉挂我青桐枝聞公有雅志高枕談庖  
羲鴻濛閱元氣彈出七條絲不論高山與流水一丘一  
壑庸詎奇蓬萊方丈可徑到阮公仲容儼在茲何用仙  
人赤城杖騰駕自有長風吹是日空堂花落時一彈為  
我生顏姿寂寂幽牕語沉沉若有思豁然野曠當簾帷  
琮琤萬馬搖金羈奔厓走石幾千里五丁運斧神工施

飛泉漠漠皎如練銀河倒下清且漪楚雲窈窕作變態  
挾將暮雨涼侵肌章華人去細腰盡仿佛似有猿聲悲  
終彈使我再三歎師今年少紅兩頤老我衰颯雙白鬢  
故山有約相參差感君古音發妙指狀君雅調無妍辭  
攫深醪愉各有以鼓琴直可還春熙

史胄司端尹奉使南海却寄

昔我北鎮奉

明詔東上海樓俯清眺海水沄沄不消眼望遠倚樓獨

長嘯三十年餘一瞬過回頭頗惜朱顏少驅馳未盡登

臨意偏仄依然卧蓬藿今君南海使再行往事不殊官

同調

昔予亦以詹事奉使

少壯能為萬里遊山行水宿向炎洲黃

木灣徑扶胥口紫瀾碧浪堆陵丘祝融冠冕儼王者視

諸海神如公侯使星所臨氣晦靄方饗拱揖若有求只今


天帝眷四顧中原黎庶安鉏耰海波不興歲屢稔五穀

飽飫魚鱉休蜃樓蛟室盡帖妥實惟廊廟思遐幽八極

大瀛在懷抱茲海一泓纔浮漚曰歸此意達

帝所精魂恍忽神光留使者詩盡人間意入海窮搜百  
靈閱韓公之碑蘇公詩如子之才端可致仙人託興雖  
偶然莫使斯文但游戲歸來歸來玉座高直上青天展

鵬翅



午亭文編卷七